

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI RABU, 22 NOVEMBER 2023, PUKUL 10.00 PAGI

Bil. 75

PERTANYAAN-PERTANYAAN BAGI JAWAB LISAN

1. PR-1523-L21832
Tuan Tan Kar Hing [Gopeng] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan perancangan Kementerian dalam memastikan industri perlombongan NRREE tanpa meninggalkan kesan terhadap kelestarian alam sekitar dan impak sosial kepada penduduk.
2. PR-1523-L21710
Tan Sri Dato' Haji Mahiaddin bin Haji Mohd. Yassin [Pagoh] minta **MENTERI EKONOMI** menyatakan perincian mengenai pengasingan kuasa Kementerian Kewangan di bawah tata kelola Kerajaan Madani, yakni sama ada Perbelanjaan Pembangunan (DE) di bawah Menteri Ekonomi dan Perbelanjaan Mengurus (OE) di bawah Menteri Kewangan.
3. PR-1523-L22411
Tuan Wong Chen [Subang] minta **MENTERI PELABURAN, PERDAGANGAN DAN INDUSTRI** menyatakan :
 - (a) status rundingan bagi semua Perjanjian Perdagangan Bebas (FTA) dan "Perjanjian Penggalakan dan Perlindungan Pelaburan" iaitu Investment Guarantee Agreement (IGA) atau Bilateral Investment Treaty (BIT); dan
 - (b) proses perundingan, mekanisme dan jangka masa perundingan untuk perjanjian-perjanjian ini.

4. PR-1523-L22646

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI KERJA RAYA** menyatakan perancangan bagi mengelak kesesakan lalu lintas, laluan sempit di kawasan pertembungan di antara 3 laluan utama ke Bukit Gantang dan Taiping, iaitu Lebuhraya WCE Susur Keluar Changkat Jering, Lebuhraya PLUS Susur Keluar Changkat Jering dan Laluan Persekutuan FT060 Changkat Jering-Batu Hampar.

5. PR-1523-L21469

Tuan M. Kulasegaran [Ipoh Barat] minta **MENTERI SUMBER MANUSIA** menyatakan :

- (a) langkah-langkah yang telah diambil oleh Kerajaan untuk memastikan semua majikan termasuk majikan daripada Perusahaan Mikro, Kecil dan Sederhana (SME) mematuhi polisi cuti bersalin yang dilanjutkan kepada 98 hari mulai 1 Januari 2023; dan
- (b) bilangan majikan yang gagal mematuhi polisi seperti di atas.

6. PR-1523-L22670

Dato' Wira Dr. Ku Abd Rahman bin Ku Ismail [Kubang Pasu] minta **MENTERI EKONOMI** menyatakan projek-projek strategik dan inisiatif-inisiatif dalam *National Energy Transition Roadmap* (NETR) yang dilancarkan pada 27 Julai lalu bagi Malaysia mencapai sasaran 70% tenaga diperbaharui menjelang 2050.

7. PR-1523-L21408

Puan Isnaraissah Munirah Majilis [Kota Belud] minta **MENTERI PENDIDIKAN TINGGI** menyatakan :

- (a) adakah Kementerian sedar bahawa tiada program/pengajian undang-undang ditawarkan di Sabah dan apakah tindakan Kementerian; dan
- (b) perkembangan terkini cadangan pembinaan Politeknik Kota Belud dan adakah ianya akan dimulakan di bawah Rancangan Malaysia Ke-12.

8. PR-1523-L21731

Kapten Dato' Dr. Zulkaferi bin Hanapi (Bersara) [Tanjong Karang] minta **MENTERI PERTANIAN DAN KETERJAMINAN MAKANAN** menyatakan untuk memastikan Jelapang Padi Negara di Tg. Karang dapat diperkasa, jadi apakah tindakan, pelan dan langkah Kementerian dalam memastikan sawah padi di Tg. Karang dapat dipertingkatkan hasilnya bagi meningkatkan ekonomi petani dan pengusahaan sawah padi terus relevan dan lestari. Penyelesaian tuntas harus merangkumi pengairan, benih, baja, racun dan pemulihan tanah serta pengurusan sawah itu sendiri secara komersial.

9. PR-1523-L(5)00192

Tuan Khoo Poay Tiong [Kota Melaka] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan tentang Empangan Durian Tunggal, Asahan Dan Jus yang disenaraikan oleh SPAN sebagai berisiko tinggi dengan menyatakan tindakan yang boleh diambil dan berapakah peruntukan akan diberikan untuk empangan-empangan tersebut agar mampu berfungsi menjamin bekalan air yang mencukupi kepada pengguna di Melaka.

[Pertanyaan di bawah PM 22(5)]

10. PR-1523-L22282

Dr. Siti Mastura binti Muhammad [Kepala Batas] minta **MENTERI PENDIDIKAN TINGGI** menyatakan :

- (a) apakah garis panduan KPT berkenaan penempatan pelajar di IPTA; dan
- (b) apakah garis panduan KPT untuk menangani kos sara hidup pelajar di IPTA.

11. PR-1523-L22086

Datuk Andi Muhammad Suryady bin Bandy [Kalabakan] minta **MENTERI KERJA RAYA** menyatakan apakah status terkini pembaikan jalan raya daif yang sering kali diibaratkan seperti bulan oleh penduduk setempat melibatkan dua laluan iaitu Jalan Merotai - Kalabakan - Sapulut (MKS) dan cerun Jalan Utama Felda Umas.

12. PR-1523-L21694

Kapten Azahari bin Hasan [Padang Rengas] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan haiwan perosak seperti babi hutan dan kera yang semakin lama semakin meliar di kawasan kediaman penduduk di kampung serta merosakkan hasil tanaman penduduk kampung. Apakah inisiatif bagi menangani masalah haiwan perosak ini.

13. PR-1523-L21262
Dr. Richard Rapu @ Aman anak Begri [Betong] minta **MENTERI PERTANIAN DAN KETERJAMINAN MAKANAN** menyatakan apakah strategi dan perancangan Kementerian untuk memperhebatkan penglibatan petani luar bandar dalam membantu usaha pengeluaran pelbagai hasil pertanian bagi keterjaminan makanan.
14. PR-1523-L22522
Tuan Shaharizukirnain bin Abd. Kadir [Setiu] minta **MENTERI EKONOMI** menyatakan pelan induk yang telah dirangka untuk meningkatkan taraf ekonomi pekerja Bumiputera tidak mahir sekaligus mengeluarkan mereka dari 'jerat kelas menengah'.
15. PR-1523-L21182
Datuk Seri Dr. Noraini Ahmad [Parit Sulong] minta **MENTERI PENDIDIKAN TINGGI** menyatakan sehingga kini berapa banyak kursus yang ditawarkan di institut pengajian tinggi yang melibatkan bidang *Advanced Technology* atau *Artificial Intelligence*, apakah inisiatif Kementerian bagi memperbanyakkan kursus berkaitan bidang ini yang dilihat akan mendominasi perubahan masa hadapan.
16. PR-1523-L22061
Tuan Zahari bin Kechik [Jeli] minta **MENTERI SUMBER MANUSIA** menyatakan jumlah kadar pengangguran belia terkini serta tindakan Kerajaan dalam menangani isu pengangguran belia.
17. PR-1523-L21053
Tuan Onn bin Abu Bakar [Batu Pahat] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan isu perubahan cuaca kini menjadi suatu fenomena di dunia. Adakah Kementerian berhasrat untuk menggubal Akta Perubahan Cuaca untuk rakyat Malaysia menjadikan isu ini sebagai satu tanggungjawab bersama.
18. PR-1523-L22502
Tuan Hassan bin Saad [Baling] minta **MENTERI PERTANIAN DAN KETERJAMINAN MAKANAN** menyatakan usaha yang telah dilakukan oleh pihak Kementerian bagi menyokong dasar penanaman padi lima kali dua tahun bagi meningkatkan tahap sara diri (SSL) produktiviti beras negara.

19. PR-1523-L21574

Puan Vivian Wong Shir Yee [Sandakan] minta **MENTERI PELABURAN, PERDAGANGAN DAN INDUSTRI** menyatakan apakah insentif yang disediakan oleh Kementerian untuk membantu membangunkan sektor pembuatan hiliran (*downstream manufacturing*) dan tenaga boleh diperbaharui (*renewable energy*) di Sabah seperti yang disebut di dalam Pelan Induk Perindustrian Baharu 2030 (NIMP) yang telah dibentangkan baru-baru ini.

20. PR-1523-L22552

Datuk Haji Awang bin Hashim [Pendang] minta **MENTERI SUMBER MANUSIA** menyatakan jumlah *Centralized Living Quarters* (CLQ) atau asrama pekerja di seluruh negara beserta dengan kapasitinya. Apakah usaha Kerajaan dalam membantu pihak majikan yang ingin membina CLQ bagi memudahkan asrama yang memenuhi standard dibina untuk pekerja mereka.

21. PR-1523-L21355

Dato' Ngeh Koo Ham [Beruas] minta **MENTERI KERJA RAYA** menyatakan mengapa Kerajaan tidak dapat memberikan peruntukan yang mencukupi untuk penyelenggaraan jalan dan lampu jalan yang asas di daerah Manjung tetapi bertegas meneruskan projek jejantas gajah putih di Batu 16, Ayer Tawar, Daerah Manjung dengan perbelanjaan tinggi sebanyak lebih kurang RM8.5 juta sungguhpun mendapat bantahan daripada saya dan orang ramai.

22. PR-1523-L22101

Dato' Seri Hamzah bin Zainudin [Larut] minta **MENTERI EKONOMI** menyatakan indikator pengukuran kemiskinan sifar yang disasarkan untuk dihapuskan menjelang akhir tahun ini dan sehingga September 2023. Berapakah jumlah rakyat Malaysia yang dikategorikan miskin tegar dan daripada jumlah itu berapa ramaikah yang telah berjaya disifarkan sepanjang Kerajaan PH-BN memerintah.

23. PR-1523-L21630

Tuan Syed Ibrahim bin Syed Noh [Ledang] minta **MENTERI KEMAJUAN DESA DAN WILAYAH** menyatakan perancangan Kementerian dalam melaksanakan peralihan kepada ekonomi hijau bagi kawasan luar bandar.

24. PR-1523-L21988
Datuk Haji Idris bin Haji Ahmad [Bagan Serai] minta **MENTERI PERTANIAN DAN KETERJAMINAN MAKANAN** menyatakan sejauh mana pelaksanaan Smart Sawah Berskala Besar (Smart SBB) diperluas di seluruh negara dan memberikan pulangan yang signifikan kepada pengeluaran padi.
25. PR-1523-L22467
Tuan Lee Chuan How [Ipoh Timor] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan strategi terkini untuk mengurangkan kebergantungan global bagi REE.
26. PR-1523-L22671
Datuk Jonathan Yasin [Ranau] minta **MENTERI PERTANIAN DAN KETERJAMINAN MAKANAN** menyatakan Kementerian sanggup untuk membantu dari segi dana kepada pihak Koperasi Pembangunan Desa (KPD) Sabah untuk membangunkan kawasan KPD di Skim Penanaman Padi Terusan Sapi di Telupid seluas 1,600 hektar bagi tujuan untuk meningkatkan pengeluaran beras tempatan Sabah.
27. PR-1523-L21340
Datuk Seri Panglima Bung Moktar bin Radin [Kinabatangan] minta **MENTERI KEMAJUAN DESA DAN WILAYAH** menyatakan apakah cadangan Kementerian di dalam menyelesaikan isu-isu infrastruktur di Sabah terutamanya berkenaan Projek Bekalan Air Luar Bandar (BALB), Bekalan Elektrik Luar Bandar (BELB) dan baik pulih rumah daif terutamanya di kawasan Parlimen yang luas seperti Parlimen Kinabatangan.
28. PR-1523-L21253
Dato Anyi Ngau [Baram] minta **MENTERI KERJA RAYA** menyatakan jajaran jalan persempadanan (*Border Road*) di Sabah dan Sarawak dengan Indonesia dan senaraikan kawasan-kawasan di Sarawak yang akan terkesan dalam rangkaian persempadanan tersebut.
29. PR-1523-L21774
Tuan Syed Saddiq bin Syed Abdul Rahman [Muar] minta **MENTERI PERTANIAN DAN KETERJAMINAN MAKANAN** menyatakan strategi-strategi yang diambil oleh Kementerian untuk merealisasikan Dasar Keterjaminan Makanan 2021 - 2025 dan Dasar Agromakanan Negara 2021 - 2030.

30. PR-1523-L22675

Dato' Azman bin Nasrudin [Padang Serai] minta **MENTERI KEMAJUAN DESA DAN WILAYAH** menyatakan perancangan Kementerian atau agensi seperti RISDA dalam meningkatkan pendapatan pekebun kecil getah atau penoreh yang sangat terkesan ketika ini selain bantuan-bantuan sedia ada seperti bantuan musim tengkujuh dan program peningkatan ekonomi dengan memberikan peluang atau latihan untuk menjalankan perniagaan.

31. PR-1523-L22059

Datuk Seri Dr. Haji Dzulkefly bin Ahmad [Kuala Selangor] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan kesediaan membentang satu 'Peta Teknologi Nasional Tenaga Boleh Baharu' (RE) atau 'National RE Technology Map' yang memperincikan teknologi-teknologi RE strategik yang perlu diberi tumpuan dalam R&D, untuk menghasilkan nilai ekonomi baru serta menjadikan Malaysia penjana RE (dan bukan sekadar pengguna teknologi) lantas menjadi hub RE global dalam jangka panjang sekaligus menyokong NETR atau 'Pelan Hala-Tuju Peralihan Tenaga Nasional'.

32. PR-1523-L22569

Dato' Hajah Siti Zailah binti Mohd Yusoff [Rantau Panjang] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan tindakan segera Kerajaan dalam menghadapi Monsun Timur Laut yang mengakibatkan banjir yang akan berlaku di negeri Pantai Timur sebagai langkah untuk mengatasi KESBAN yang masih belum siap sepenuhnya.

33. PR-1523-L21406

Tuan Edwin anak Banta [Selangau] minta **MENTERI PERTANIAN DAN KETERJAMINAN MAKANAN** menyatakan apakah perancangan dalam menggalakkan rakyat berminat ke industri pertanian bagi menjamin keperluan makanan dalam negara.

34. PR-1523-L21452

Tuan Mohamad Shafizan Haji Kepli [Batang Lupar] minta **MENTERI KEMAJUAN DESA DAN WILAYAH** menyatakan apakah terdapat rancangan daripada pihak Kementerian bagi menaik taraf atau membina baru kelas tabika KEMAS terutamanya yang beroperasi di bangunan-bangunan daif dan menumpang bangunan lain seperti surau, masjid, balai raya dan sebagainya terutamanya di Sarawak.

35. PR-1523-L21464
Tuan M. Kulasegaran [Ipoh Barat] minta **MENTERI SUMBER MANUSIA** menyatakan konvensyen ILO yang akan diperbetulkan dan undang-undang buruh tempatan yang akan dipinda untuk menjamin persekitaran kerja yang selamat dan selesa dan menambah baik keadaan buruh seperti yang dinyatakan dalam model ekonomi Madani.
36. PR-1523-L22346
Tuan Jamaludin bin Yahya [Pasir Salak] minta **MENTERI KERJA RAYA** menyatakan mengapa jalan FT 109 dari Kampung Gajah ke Teluk Intan sejauh 27 kilometer tidak dibaiki sebaiknya, sebaliknya hanya ditampal setiap kali rosak sehingga berlaku kemalangan terutamanya di selekoh Kampung Teluk Memali.
37. PR-1523-L22018
Tuan Mohd Azizi bin Abu Naim [Gua Musang] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah Kerajaan tidak bercadang untuk menaik taraf Pejabat Perhilitan Gua Musang termasuk menambah bilangan anggota dan kelengkapan lengkap memandangkan ancaman hidupan liar di Gua Musang menunjukkan peningkatan yang semakin ketara.
38. PR-1523-L21591
Tuan Roy Angau anak Gingkoi [Lubok Antu] minta **MENTERI KEMAJUAN DESA DAN WILAYAH** menyatakan apakah perancangan Kementerian untuk menyambungkan bekalan air bersih dan elektrik 24 jam di kawasan hulu sungai sekitar Lubok Antu dan Engkelili seperti di Ulu Skrang, Ulu Lemanak, Ulu Engkari, dan Ulu Batang Ai yang penduduknya tidak mempunyai akses kepada bekalan air dan elektrik sejak bertahun-tahun lamanya.
39. PR-1523-L22116
Tuan Ahmad Fadhli bin Shaari [Pasir Mas] minta **MENTERI PELABURAN, PERDAGANGAN DAN INDUSTRI** menyatakan sejauh mana komitmen Kementerian dalam memudahkan proses perdagangan dan perniagaan dengan mengurangkan kerenah birokrasi melalui usaha berterusan oleh agensi-agensi Kerajaan seperti MIDA, MATRADE, SME Corp, MPC, MIDF dan sebagainya.
40. PR-1523-L21985
Tuan Haji Mohd Misbahul Munir bin Masduki [Parit Buntar] minta **MENTERI PERTANIAN DAN KETERJAMINAN MAKANAN** menyatakan langkah-langkah Kementerian bagi memastikan bekalan makanan negara terutama beras tempatan mencukupi dan dijual dengan harga yang berpatutan.

41. PR-1523-L21913

Ir. Ts. Haji Khairil Nizam bin Khirudin [Jerantut] minta **MENTERI PERTANIAN DAN KETERJAMINAN MAKANAN** menyatakan :

- (a) apakah inisiatif Kementerian agar masalah benih ikan patin yang kebolehtahan hidupnya semakin rendah dapat diselesaikan, terutamanya di Jerantut; dan
- (b) adakah Kementerian akan memberi subsidi untuk makanan ikan para penternak ikan patin.

42. PR-1523-L21394

Tuan Chow Kon Yeow [Batu Kawan] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan usaha serta pelaksanaan program tenaga boleh diperbaharui di seluruh negara. Adakah Kementerian akan menyalurkan peruntukan kepada setiap negeri berhubung pemasangan hab pengecasan kenderaan elektrik (EV) berlandaskan komitmen pelepasan karbon sifar bersih atau '*net-zero emissions*' yang diuar-uarkan dan apakah strategi serta tempoh masa penggunaan kereta elektrik secara 100 peratus dalam negara.

43. PR-1523-L22359

Tuan Ahmad Tarmizi bin Sulaiman [Sik] minta **MENTERI EKONOMI** menyatakan projek yang diperuntukkan untuk pembangunan daerah Sik khusus untuk mensifarkan kemiskinan di daerah ini.

44. PR-1523-L21398

Tuan Edwin anak Banta [Selangau] minta **MENTERI KEMAJUAN DESA DAN WILAYAH** menyatakan :

- (a) apakah status terkini projek tiga loji air yang terletak di Parlimen Selangau iaitu loji air Stapang, loji air Selangau dan loji air Sangan; dan
- (b) apakah tindakan sementara untuk mengatasi masalah air ini.

45. PR-1523-L22643

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PERTANIAN DAN KETERJAMINAN MAKANAN** menyatakan adakah KPTM mempunyai cadangan untuk menukar bantuan subsidi minyak diesel 70 juta liter bersamaan (RM87,500,000.00) sebulan kepada kapal laut dalam kategori A, B dan C kepada intensif pendaratan ikan. Ini bagi meningkatkan produktiviti, kawalan hasil lautan negara serta ketirisan minyak subsidi diesel.

46. PR-1523-L21642
Tuan Suhaizan bin Kaiat [Pulau] minta **MENTERI PELABURAN, PERDAGANGAN DAN INDUSTRI** menyatakan unjuran penggunaan kenderaan elektrik mengikut tahun hadapan dan apakah kesannya kepada sektor peniagaan berkaitan seperti kedai membaiki kenderaan, stesen minyak dan lain-lain.
47. PR-1523-L21415
Puan Isnaraissah Munirah Majilis [Kota Belud] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan langkah bersepadu bagi tempoh jangka masa pendek dan panjang bagi mengurangkan kejadian bencana banjir di Sabah melalui projek tebatan banjir, pembaikan/ pembinaan infrastruktur saluran serta pembangunan lestari bagi baki Rancangan Malaysia Ke-12.
48. PR-1523-L22291
Tuan Nurul Amin bin Hamid [Padang Terap] minta **MENTERI KEMAJUAN DESA DAN WILAYAH** menyatakan berapa nilai kutipan cukai Kumpulan Wang Perusahaan Getah (Penanaman Semula) (SES) bagi tahun 2022 dan suku pertama tahun 2023, dan nyatakan jumlah yang telah dibelanjakan dalam penanaman semula serta penyelidikan hasil daripada cukai SES ini dalam tempoh tersebut.
49. PR-1523-L21670
Datuk Wira Hajah Mas Ermieyati binti Samsudin [Masjid Tanah] minta **MENTERI SUMBER MANUSIA** menyatakan tindakan yang telah diambil bagi menarik golongan pemandu gig terutamanya golongan muda untuk menceburi bidang-bidang yang mempunyai hala tuju pekerjaan yang menjamin masa depan melalui Latihan Teknikal dan Vokasional, TVET.
50. PR-1523-L21499
Puan Wong Shu Qi [Kluang] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan jumlah penjimatan berikutan pelaksanaan subsidi bersasar bil elektrik, dan jumlah akaun pengguna yang terkesan mengikut kategori industri dan domestik, serta negeri.

ATURAN URUSAN MESYUARAT DAN USUL-USUL

1. **Menyambung semula pertimbangan ke atas Rang Undang-undang Perbekalan 2024 (D.R.31/2023) dan Usul Anggaran Perbelanjaan Pembangunan 2024 seperti berikut :**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari sembilan puluh dua bilion ringgit (RM92,000,000,000) dibelanjakan daripada Kumpulan Wang Pembangunan bagi tahun 2024, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2024, yang dibentangkan sebagai Kertas Perintah 34 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut.”

Dalam Jawatankuasa Sebuah-buah Majlis (21 November 2023)

2. (D.R. 36/2023) Rang Undang-Undang Kewangan (No.2) 2023. **Bacaan Kali Yang Kedua**
[Menteri Kewangan]
3. (D.R. 33/2023) Rang Undang-Undang Syarikat (Pindaan) 2023 - **Menyambung semula perbahasan atas masalah, "Bahawa Rang Undang-undang ini dibacakan kali yang kedua sekarang." (12 Oktober 2023)**
[Menteri Perdagangan Dalam Negeri dan Kos Sara Hidup]
4. (D.R. 25/2023) Rang Undang-Undang Kawalan Produk Merokok Demi Kesihatan Awam 2023 – **Bacaan Kali Yang Kedua**

Dan;

Pengerusi Jawatankuasa Pilihan Khas Kesihatan oleh Yang Berhormat Datuk Seri Dr. Dzulkefly bin Ahmad, Ahli Parlimen Kuala Selangor akan mencadangkan :

“BAHAWA Penyata yang disiapkan oleh Jawatankuasa Pilihan Khas Kesihatan untuk mengkaji Rang Undang-Undang Kawalan Produk Merokok Demi Kesihatan Awam 2023, yang dibentangkan dalam Majlis ini sebagai Kertas DR. 8 Tahun 2023 diperkenankan mengikut Peraturan Mesyuarat 60”.

5. (D.R. 26/2023) Rang Undang-Undang Makanan (Pindaan) 2023. **Bacaan Kali Yang Kedua**
[Menteri Kesihatan]

6. PR-1523-U(27)278
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera menangani isu gangguan bekalan beras putih tempatan (BPT) di pasaran yang kian meruncing susulan tindakan India menghentikan eksport beras putihnya ke pasaran.

Langkah penetapan had pembelian maksimum 100kg BPT untuk setiap individu dan syarikat bermula 7 September 2023 hanyalah penyelesaian yang bersifat sementara dan Kerajaan seharusnya mula merangka satu pelan yang lebih tuntas dalam usaha menjamin keterjaminan bekalan beras di Malaysia bagi jangka masa yang panjang.

Kerajaan perlu segera mewujudkan rangka tindakan yang lebih komprehensif bagi mengurangkan impak inflasi makanan global dari terus menghimpit rakyat negara ini khususnya berkaitan beras yang menjadi makanan ruji kita semua."

[Menteri Pertanian dan Keterjaminan Makanan]

7. PR-1523-U(27)279
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan mencari penyelesaian untuk mengurangkan kos pengambilan pekerja asing yang kian melambung tinggi. Kebergantungan majikan tempatan terhadap pekerja asing berbanding pekerja tempatan di negara ini bukanlah perkara asing terutama dalam sektor 3D (*dirty, dangerous and difficult*).

Maka, adalah penting untuk mewujudkan satu dasar yang lebih komprehensif bagi mengurangkan kebergantungan terhadap pekerja asing agar pekerja tempatan diberi keutamaan terlebih dahulu dengan reformasi terhadap ekosistem sektor 3D meliputi kadar gaji, faedah dan sebagainya yang berpadanan dengan risiko pekerjaan perlu diimplementasikan secara berseiringan."

[Menteri Dalam Negeri]

8. PR-1523-U(27)280

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mewujudkan satu dasar mengutamakan sajian menu buah-buahan tempatan di semua majlis rasmi Kerajaan sebagai galakan dan sokongan kepada pemain industri buah-buahan tempatan serta ke arah membudayakan amalan pemakanan sihat.

Adalah menjadi tanggungjawab Kementerian bagi membantu pengusaha buah-buahan tempatan untuk memasarkan serta mempromosi hasil ladang mereka dan sekali gus meningkatkan pendapatan. Maka melalui sajian menu buah-buahan di kesemua majlis rasmi Kerajaan perlu dibudayakan sepenuhnya sebagai sokongan terhadap industri buah-buahan tempatan.

[Menteri Pertanian dan Keterjaminan Makanan]

9. PR-1523-U(27)281

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan jangka masa panjang yang menyeluruh dalam memastikan Jumlah Kadar Kesuburan (Total Fertility Rate) bagi rakyat Malaysia terus meningkat.

Negara kita telah beralih ke status negara menua pada tahun 2021. Hal ini kerana peratusan penduduk berusia 65 tahun dan ke atas telah mencapai 7% daripada jumlah populasi. Trend ini menunjukkan peningkatan dalam dua tahun lalu pada kadar 0.2 peratus setahun di mana pada tahun 2022 sebanyak 7.2% dan dijangka pada tahun 2023 mencapai 7.4%.

Dalam tempoh dua dekad lagi, negara dijangka beralih kepada negara tua apabila kohort umur yang sama mencapai 14% daripada jumlah populasi. Peralihan ini tentunya memberikan kesan yang paling ketara iaitu kepada penurunan trend populasi pekerja dan produktiviti. Bagi menghadapi cabaran dan dampak negara menua, kita perlu mencari jalan memperlahankan proses penuaan ini. Proses penuaan ini tidak boleh dihalang atau diberhentikan tetapi kita perlu mempunyai pelan persediaan bagi menghadapi situasi tersebut.

Jika kita teliti jumlah peratusan struktur umur penduduk yang berumur 0-14 tahun berlaku penurunan pada kadar 0.4% bagi 3 tahun iaitu ; tahun 2020 sebanyak 24%, 2021 sebanyak 23.6%, 2022 sebanyak 23.2%, dan 2023 sebanyak 22.6%.

Umum mengetahui negara-negara jiran dan serantau juga menghadapi perkara penurunan bagi jumlah kadar kesuburan, tetapi kadar tersebut agak perlahan penurunannya. Sehubungan itu, objektif kita agar dapat melandaikan graf penurunan ini bagi negara kita.

Persoalan saya, apakah kemampuan hospital Kerajaan dalam meningkatkan kemampuan kesihatan reproduktif. Berapa jumlah Hospital yang menyediakan perkhidmatan IUI dan IVF. Berapa ramai doktor pakar reproduktif masih berkhidmat di hospital Kerajaan. Adakah harga perkhidmatan yang dikenakan mampu diakses oleh rakyat. Berapa jumlah makmal reproduktif.

Dewan Rakyat juga perlu mencadangkan agar Kerajaan menetapkan polisi yang mampan seperti fleksibel waktu bekerja, yuran pusat penjagaan kanak yang mampu bayar, perbanyakkan pusat asuhan ditempat kerja, dan *paternity leave* kepada ibu bapa yang bekerja untuk meringankan bebanan mereka dalam meningkatkan kadar reproduktif rakyat Malaysia. *Population Complexity* ini yang harus kita uruskan dengan penuh keberanian dan semua pihak kena bersama-sama."

[Menteri Pembangunan Wanita, Keluarga dan Masyarakat]

10. PR-1523-U(27)283

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah Kertas Putih Imigresen yang membincangkan tentang kadar atau jumlah sebenar kemasukan pelawat asing ke negara Malaysia.

Perkara ini bertujuan untuk mengetahui pergerakan pelawat asing berkenaan sama ada mereka terus tinggal di Malaysia atau dalam satu tempoh tertentu. Menerusi ini kita akan mengetahui jumlah sebenar populasi rakyat di negara ini melalui pengenalpastian perbezaan antara jumlah Warganegara Malaysia, Jumlah Pelawat Asing yang masuk ke negara kita sebagai pekerja ataupun dengan tujuan melancong.

Hal ini, akan memudahkan Kerajaan untuk merangka dan melaksanakan pelbagai pelan inisiatif mahupun bantuan seperti subsidi bersasar dan lain-lain agar setiap pelaksanaan tersebut dinikmati oleh rakyat di negara kita."

[Menteri Dalam Negeri]

11. PR-1523-U(27)286

Datuk Seri Panglima Madius Tangau [Tuaran] akan mencadangkan :

"Bahawa Dewan ini menerima hakikat bahawa lebih 100,000 calon peperiksaan SPM pada tahun 2022 telah gagal dalam mata pelajaran dan sekaligus gagal mendapat Sijil Pelajaran Malaysia (SPM).

Menerima hakikat juga bahawa kegagalan dalam peperiksaan SPM ini mengakibatkan masa depan yang gelap kepada calon pada purata 70 ribu hingga 100 ribu setahun.

Menerima hakikat bahawa pelajar tercicir ini tidak ada lagi ruang untuk melanjutkan pelajaran maka segolongan pelajar tercicir ini akan menjadi kerugian dalam sumber tenaga kerja negara.

Dan menerima hakikat bahawa matlamat mendidik sebuah generasi pelajar untuk membina dan membangun negara kita telah gagal maka Kerajaan hendaklah mengambil tindakan yang serius terhadap masalah ini.

Maka dengan itu Dewan Yang Mulia ini hendaklah membuat ketetapan agar silibus dan buku-buku teks Subjek Sejarah Tingkatan Satu, Dua, Tiga, Empat dan Tingkatan Lima hendaklah dikaji semula dan sebuah Jawatankuasa Pilihan Khas Parlimen hendaklah ditubuhkan untuk mendapat pandangan daripada setiap lapisan masyarakat daripada seluruh pelusuk negara, dan pada masa yang sama Jemaah Kabinet hendaklah menubuhkan sebuah Jawatankuasa Kabinet Kajian Semula Silibus dan Buku Teks Sejarah yang dianggotai oleh Menteri-Menteri yang mewakili Sabah, Sarawak, Persekutuan Tanah Melayu dan parti-parti politik yang menubuhkan Kerajaan Perpaduan."

[Menteri Pendidikan]

12. PR-1523-U(27)287

Datuk Seri Panglima Madius Tangau [Tuaran] akan mencadangkan :

"Bahawa Dewan ini Menerima hakikat bahawa sebuah Suruhanjaya Siasatan DiRaja yang ditubuhkan oleh Kerajaan suatu ketika dahulu telah berjaya membuat siasatan dan seterusnya telah dibentangkan di Dewan Yang Mulia ini.

Dan menerima hakikat bahawa setelah sekian lama laporan tersebut telah gagal dilaksanakan dan mengakibatkan ketidakpuasan hati sebahagian besar daripada rakyat Malaysia.

Menerima hakikat juga bahawa rakyat tertanya-tanya apakah yang telah terjadi dengan laporan Suruhanjaya Siasatan DiRaja tersebut.

Dan menerima hakikat bahawa kecelaruan urus tadbir Pendatang Tanpa Izin; Penduduk Asing di Sabah yang mempunyai Kad Pengenalan yang meragukan; Peningkatan Bilangan penduduk di Sabah Tanpa Kewarganegaraan ataupun *stateless children* dan kehadiran orang asing yang memegang dokumen IMM13 yang tidak ada halatuju.

Maka Dewan Yang Mulia ini hendaklah membuat ketetapan bahawa sebuah Jawatankuasa Pilihan Khas Parlimen untuk meneliti dan mengkaji semula rekomendasi dan perakuan Laporan Suruhanjaya Siasatan DiRaja Mengenai Pendatang Asing Tanpa Izin untuk merumuskan suatu Road Map penyelesaian tuntas terhadap masalah oleh empat kategori penduduk golongan pendatang asing di Sabah."

[Menteri Dalam Negeri]

13. PR-1523-U(27)290

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan meletakkan sebuah garis panduan untuk sekolah-sekolah bagi pengurusan dana, perbelanjaan, dan juga aktiviti kutipan wang daripada pelajar, ibu-bapa, dan orang ramai. Selain itu, sebuah badan pemantau perlu diwujudkan bagi memastikan garis panduan ini dipatuhi. Ini kerana, kini sudah menjadi sebuah kelaziman untuk pihak-pihak sekolah menganjurkan program-program dan majlis-majlis yang memakan belanja besar, yang menggunakan duit daripada poket pelajar. Sebahagian daripada majlis ini mewajibkan kehadiran, dan sebahagian lainnya adalah secara sukarela. Tetapi harus kita faham, kewujudan jurang ekonomi akan membuatkan wujudnya golongan pelajar yang rasa keciciran sosial disebabkan faktor kewangan keluarga. Ia juga membuat mereka berasa tertekan serta memberi tekanan kepada ibu-bapa, lebih-lebih lagi dalam situasi ekonomi kini. Bukan sahaja untuk majlis, malah sering juga pihak sekolah membuat kutipan wajib bagi pembaharuan infrastruktur, dan kutipan ini kadangkala boleh mencecah ratusan ringgit. Isu ini merupakan sebuah isu yang kurang mendapat perhatian tetapi penting untuk dibawa ke hadapan kerana ia melibatkan sosioekonomi keluarga B40 dan M40 serta kesejahteraan perkembangan minda dan emosi para pelajar yang bakal menjadi teraju negara ini di masa hadapan. Selain itu, dibimbangi jika tiada pemantauan dilakukan, perkara ini akan membuka ruang untuk pihak tertentu mengambil kesempatan."

[Menteri Pendidikan]

14. PR-1523-U(27)291

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengambil langkah pro-aktif dalam menangani serta menghentikan kes jenayah dera kanak-kanak di negara ini. Menteri Dalam Negeri pada 14 Mac 2023 melaporkan bahawa terdapat 220 kes kanak-kanak mati akibat penderaan antara tahun 2018 hingga 2022. Data Kementerian Pembangunan Wanita, Keluarga dan Masyarakat antara Januari hingga Jun 2022 juga mendedahkan terdapat 1,055 kes penderaan kanak-kanak di negara ini. Kanak-kanak adalah masa depan negara. Lantaran itu, pihak kerajaan wajar menangani lantas menghentikan kitaran dera ini dengan sebuah target 'Dera Sifar' menerusi langkah-langkah pro-aktif seperti mewajibkan kursus penjagaan anak, mewujudkan sistem pemantauan berkala, meneliti semula undang-undang serta garis panduan berkenaan penjagaan kanak-kanak, meningkatkan kesedaran masyarakat, dan lain-lain."

[Menteri Dalam Negeri]

15. PR-1523-U(27)292

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat menggesa Kerajaan mengambil tindakan yang lebih pro-aktif dan efisien bagi meningkatkan kesedaran, tindak balas, dan kerjasama masyarakat dalam menghadapi bencana alam. Kerajaan telah mengumumkan penubuhan Pusat Bencana Geologi Negara pada akhir tahun ini serta pembangunan Sistem Amaran Awal Tanah Runtuh (SAATR). Inisiatif ini akan dapat meningkatkan kecekapan tindak balas bencana agensi-agensi berkaitan. Bagaimana pula dengan tindak balas masyarakat."

Apa yang telah dan sedang Kerajaan usahakan bagi memastikan rakyat bukan sahaja peka tetapi takut dan patuh kepada arahan yang dikeluarkan oleh pihak berkuasa. Kerajaan perlu menguatkuasakan Akta Pertahanan Awam 1951, Akta 221 bawah seksyen 4 (C) di mana tindakan boleh diambil ke atas mereka yang tidak patuh kepada arahan pihak berkuasa contohnya arahan untuk berpindah dalam situasi banjir yang boleh membahayakan penduduk dan pada masa yang sama memberi risiko kepada penyelamat."

[Perdana Menteri]

16. PR-1523-U(27)293

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan seperti beras tempatan, ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan. Kerajaan tidak seharusnya melepaskan tanggungjawab menjaga keterjaminan bekalan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

17. PR-1523-U(27)294

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi."

[Menteri Pertanian dan Keterjaminan Makanan]

18. PR-1523-U(27)295

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan seringkali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

19. PR-1523-U(27)296

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu plan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket perdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada plan pembangunan komprehensif dan terperinci yang diumumkan. Mohon pihak kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu plan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara."

[Perdana Menteri]

20. PR-1523-U(27)297

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMK-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan Negeri khususnya di Perlis untuk mempelbagaikan fungsi sesuatu projek sedangkan Kerajaan Negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu. Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek."

[Menteri Ekonomi]

21. PR-1523-U(27)298

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar '*rebranding*' daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan

Negara dan memerlukan input dari pelbagai Agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40."

[Perdana Menteri]

22. PR-1523-U(27)299

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

23. PR-1523-U(27)300

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal ini demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiaga siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

24. PR-1523-U(27)301

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidaklangsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

25. PR-1523-U(27)302

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

26. PR-1523-U(27)303

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media. Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan. Oleh demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu."

[Menteri Komunikasi dan Digital]

27. PR-1523-U(27)304

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

28. PR-1523-U(27)305

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan keluar dan masuk sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu. Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya. Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu. Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka."

[Menteri Dalam Negeri]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
DR. 14	Penyata Jawatankuasa Pilihan Khas Perdagangan Dalam Negeri, Keusahawanan, Kos Sara Hidup Dan Pertanian Mengenai Isu Minyak Masak Bersubsidi	22 November 2023
DR. 15	Penyata Jawatankuasa Pilihan Khas Perdagangan Dalam Negeri, Keusahawanan, Kos Sara Hidup Dan Pertanian Mengenai Rang Undang-Undang Syarikat (Pindaan) 2023	22 November 2023
CMD. 53	Laporan Ketua Audit Negara Tahun 2022 Mengenai Aktiviti Kementerian/Jabatan Kerajaan Persekutuan dan Badan-Badan Berkanun Persekutuan	22 November 2023
CMD. 54	Laporan Ketua Audit Negara Tahun 2022 Mengenai Pengurusan Syarikat Kerajaan Persekutuan	22 November 2023
CMD. 55	Laporan Ketua Audit Negara Tahun 2022 Mengenai Auditan Khas Pengurusan Hutan dan Impak Kepada Alam Sekitar	22 November 2023
CMD. 56	Laporan Ketua Audit Negara Tahun 2022 Mengenai Aktiviti Jabatan/Agensi dan Pengurusan Syarikat Kerajaan Negeri Johor	22 November 2023
CMD. 57	Laporan Ketua Audit Negara Tahun 2022 Mengenai Aktiviti Jabatan dan Pengurusan Syarikat Kerajaan Negeri Kedah.	22 November 2023
CMD. 58	Laporan Ketua Audit Negara Tahun 2022 Mengenai Aktiviti Jabatan dan Pengurusan Syarikat Kerajaan Negeri Kelantan	22 November 2023
CMD. 59	Laporan Ketua Audit Negara Tahun 2022 Mengenai Aktiviti Jabatan/Agensi Negeri Melaka	22 November 2023
CMD. 60	Laporan Ketua Audit Negara Tahun 2022 Mengenai Aktiviti Jabatan dan Pengurusan Syarikat Kerajaan Negeri, Negeri Sembilan	22 November 2023

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
CMD. 61	Laporan Ketua Audit Negara Tahun 2022 Mengenai Aktiviti Agensi dan Pengurusan Syarikat Kerajaan Negeri Pahang	22 November 2023
CMD. 62	Laporan Ketua Audit Negara Tahun 2022 Mengenai Aktiviti Jabatan/Agensi dan Pengurusan Syarikat Kerajaan Negeri Perak	22 November 2023
CMD. 63	Laporan Ketua Audit Negara Tahun 2022 Mengenai Aktiviti Jabatan Negeri Perlis	22 November 2023
CMD. 64	Laporan Ketua Audit Negara Tahun 2022 Mengenai Aktiviti Jabatan/Agensi dan Pengurusan Syarikat Kerajaan Negeri Pulau Pinang	22 November 2023
CMD. 65	Laporan Ketua Audit Negara Tahun 2022 Mengenai Aktiviti Jabatan dan Pengurusan Syarikat Kerajaan Negeri Sabah	22 November 2023
CMD. 66	Laporan Ketua Audit Negara Tahun 2022 Mengenai Aktiviti Kementerian/Jabatan/Agensi dan Pengurusan Syarikat Kerajaan Negeri Sarawak	22 November 2023
CMD. 67	Laporan Ketua Audit Negara Tahun 2022 Mengenai Aktiviti Jabatan/Agensi dan Pengurusan Syarikat Kerajaan Negeri Selangor	22 November 2023
CMD. 68	Laporan Ketua Audit Negara Tahun 2022 Mengenai Aktiviti Jabatan/Agensi dan Pengurusan Syarikat Kerajaan Negeri Terengganu	22 November 2023

****UCAPAN-UCAPAN**
(PERATURAN MESYUARAT 17)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 22.11.2023 (Rabu)	1. YB Tuan Cha Kee Chin (Rasah)	1. Kes Penipuan di Seremban	1. YB Menteri Dalam Negeri
2. 22.11.2023 (Rabu)	2. YB Tuan Cha Kee Chin (Rasah)	2. Isu Kekurangan Guru	2. YB Menteri Pendidikan
3. 22.11.2023 (Rabu)	3. YB Puan Vivian Wong Shir Yee (Sandakan)	3. Pembinaan Sekolah Seni Malaysia Sabah di Sandakan	3. YB Menteri Pendidikan
4. 22.11.2023 (Rabu)	4. YB Puan Vivian Wong Shir Yee (Sandakan)	4. Status Naik Taraf Hospital Duchess of Kent Sandakan	4. YB Menteri Kesihatan

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**